

Kōrero

Pānui

Tuhituhi

Pāngarau

Tau 6

**Kua waihangatia Ngā Whanaketanga Rumaki Māori kia mōhio ai tātou kei whea tō tamaiti i roto i ngā mahi ako i Te Reo Matatini me te Pāngarau.**

E hāngai pū ana ngā whanaketanga ki te Marautanga o Aotearoa, ko te whakaako i ngā wāhanga ako katoa, arā – Te Reo Māori, te Pāngarau, te Pūtaiao, ngā Tikanga ā-Iwi, te Hauora, Ngā Toi, Te Reo Ingarihi me te Hangarau.

Me mātua whakarato te kura o tō tamaiti i ētahi pūrongo ā-tuhi e rua i te iti rawa ki a koe i ia tau. Mā au pūrongo koe e whakamōhio e rere pēhea ana tō tamaiti i runga anō i Ngā Whanaketanga me te Marautanga. Mā te kura hoki tana kōpaki mahi e homai, heoi ki te kore, tonoa te kaiako kia whakaatu mai i ētahi tauira o ana mahi.

Mō te pukaiti nei, kua kapohia ngā momo akoranga a tō tamaiti i tana tau tuaono i te kura – ā-kōrero, ā-panui, ā-tuhituhi, ā-pāngarau anō hoki. He kaponga noa iho ēnei e kite ai koe e pēhea ana ōna mōhioanga, ōna āheinga hoki i roto i ēnei wāhanga ako.

Mēnā kua uru atu tō tamaiti i nā tata ake ki roto i te mātauranga rumaki ki te reo Māori, tērā pea ka paku rerekē te āhua e aromatawaihia ai – hei whakaata i tōna roa i roto i te mātauranga rumaki. Kōrero ki tō kaiako mēnā he āwangawanga ōu – māna e whakamārama ki a koe kei te pēhea te haere o āna mahi ako.



## Kōrero

I te tau tuaono i te kura, ko te reo kōrero o tō tamaiti kei te taumata 3 o te marautanga.

E tū māia ana tō tamaiti ki te kōrero mō te huhua o ngā kaupapa, he kaha ake hoki tana whakauru i te reo whakaahua me te reo peha, pēnei i te whakataukī me te kīwaha, ki roto i āna kōrero. E taunga ana ia ki te uiui e pā ana ki tētahi kaupapa me te whakaatu i ngā putanga.

E ako ana tō tamaiti ki te:


- tautohu i ngā kupu, ngā kīanga me ngā ariā matua o roto i te kōrero
- tautohu, ki te matapaki hoki i ngā momo reo a te kaikōrero
- whakauru i ngā kupu me ngā kīanga e hāngai ana ki te horopaki, te kaupapa me ngā kaiwhakarongo
- whakapuaki i ōna whakaaro i roto i ngā āhuatanga Māori tonu, pēnei i te marae, te kura, te kapa haka me te waka ama.

### He tauira o ngā mahi kōrero, mahi whakarongo

He mahi rangahau – he patapatai i ētahi atu ākonga kia kite ko tēhea te momo waea pūkoro kua whiwhi rā te nuinga. Kātahi ka whakaatu ā-kauwhata nei i ngā pārongo ki ana hoa akomanga.

### I te kāinga

- Whakatītinahia ō tamariki ki te mahi whakaari hei whakaatu ki tētahi hui a te whānau taihoa ka tū. Whakawhiti kōrero e pā ana ki ō rātou hiahia – he kākahu, he pūoro, he taputapu, he tuhinga whakaari, he aha atu rānei.
- Whakawhitiwhiti kōrero kōrua ko tō tamaiti e pā ana ki ngā pukapuka e pānuitia ana e ia, ki ngā kaupapa rānei e pai ana ki a ia.
- Ākona ngā kupu mō te hākinakina e tākarohia ana e tō tamaiti, kia tautokona ia i te wā e tākaro ana – “Tau kē koe, e hine!”, “Kei runga noa atu koe, e tama!”



# Pānui

I te tau tuaono i te kura, ko te reo pānui o tō tamaiti kei te taumata 3 o te marautanga. E pānui ana ia i ngā pukapuka mai i waenganui ki te mutunga o te Kete Pīngao.

E taea ana e tō tamaiti te pānui i te whānuitanga atu o ngā tuhinga, ā-hinengaro, ā-waha hoki, me te arohaehae i tāna e pānui ai. E pai ana te rere o te kupu i te waha, ka tika anō te tangi o tana reo hei kawē i ngā whakaaaro e mau mai ana ki roto.

E ako ana tō tamaiti ki te:

- matapakī i te pūtake i tuhia ai te kōrero – ko te whakawhere pea, ko te whakamihi, ko te whakamōhio rānei
- tautohu i ngā kupu tūhono whakaaaro – nō reira, waihoki, heoi anō
- tautohu i ngā kōwae me te hanganga o te kōwae – he rerenga matua, he rerenga tautoko, he rerenga whakakapi hoki
- tautohu i ngā tuhinga pono me ngā tuhinga pohewa
- whakamahi i ōna mōhiotanga ki ngā kūmuri (haerenga, tīmatanga) me ngā kūmua (kaiako, whakakata) ki te wetewete, ki te kimi i te tikanga o ētahi kupu hou.

**Kua wehewehe ngā pukapuka ki roto ‘Kete’. Tīmata ana ki te Kete Harakeke – he māmā, he poto te tuhinga. Ka piki ake ki te Kete Kiekie, te Kete Pīngao, ā, ki te Kete Miro rā anō. Kei ia pikinga kete ka uaua ake, ka matatini ake te tuhinga. Hei tana tau tuawhitu i te kura ko te tikanga e pānui ana tō tamaiti i ngā pukapuka mai i te mutunga o te Kete Pīngao.**



**Ko ētahi āhuatanga o te pukapuka Pīngao i tēnei reanga**

- Kāore i pērā rawa te hāngai o ngā pikitia ki te tuhinga.
- He uaua ake ngā kārawarawatanga.
- He huhua tonu ngā momo tīmatanga rerenga.
- He roa ake, he matatini ake ngā rerenga.
- He tuhinga hautaka poto me ngā paki poto.

**I tō tamaiti e pānui ana i tēnei kōrero, tērā pea ka:**

- whakaaaro ake ia ki ngā mea e mōhio kē ana ia e pā ana ki te kaupapa o te tuhinga
- whakaaaro ki ētahi pātai ka whakautua pea e te tuhinga
- rapu i ngā kupu hira
- pānui kia tere tonu.

**I te kāinga**

- Āwhinatia tō tamaiti ki te tautohu i tētahi kaituhi, kiripuaki, huinga pukapuka rānei e pai ana ki ia, me te rapu i ētahi atu pukapuka nā taua kaituhi anō i tuhi.
- Hokona tētahi huinga moheni (ka tukuna mai i ia marama pea) e pā ana ki tētahi kaupapa e ngākaunuitia ana e tō tamaiti. Rapua rānei ētahi tuhinga ki te whare pukapuka, ki te Ipurangi rānei.
- Horahia ngā momo tuhinga maha ki tō whare hei pānuitanga mā te whānau – he pukapuka, he moheni, he niupepa, he aha atu rānei.




## Tuhituhi

I te tau tuaono i te kura, ko te reo tuhituhi o tō tamaiti kei te taumata 3 o te marautanga.

E taea ana e tō tamaiti te tuhituhi i ngā momo tuhinga maha, me te pai anō o te rere o te kupu. E whakamahi ana ia i ngā kupu me ngā āhuatanga reo e hāngai ana ki te kaupānui me te pūtake o te tuhituhi.

E ako ana tō tamaiti ki te:

- kōwhiri i te momo tuhinga e tika ana mō ngā kaupānui
- whakaraupapa i ana tuhinga me te whakamahi i ngā kōwae, ngā tapanga, ngā hoahoa, ngā pikitia me ngā hauraro
- whakangahau i te kaupānui, hei tauira, mā roto i te paki, i te whiti, i te whakaari rānei
- whakamahi i ētahi atu tuhinga hei tauira mō ngā momo āhuatanga tuhituhi pēnei me te anga, te tāhuhu me te whakaahua i ngā kiripuaki
- matapaki i ngā tuhinga a ētahi atu, hei tauira, mā te tautohu i ngā kupu me ngā kianga i pai ki a ia, he hanga whakaahua nō aua mea rā i tana hinengaro.



I tēnei tuhinga a te tamaiti nei, kua:

- whakaritea e ia ngā ariā e whai pānga ana ki te kōwae
- whakaurua te reo whakawhere
- whakaurua ngā tohutoro ā-waha, hei tauira, a Māmā me te kaiako.

I te kāinga

- Tuhia tētahi rangitaki e pā ana ki tētahi kaupapa nui ki tō whānau, hei tauira, te hī ika, te waka ama, te kapa haka rānei.
- Tuhia he kōrero e āta tāpae ana i tētahi tono motuhake, hei tauira, he tono i tētahi taonga, i tētahi haerenga rānei.
- Rapua ētahi taupānga me ētahi kēmu reo utukore mō te rorohiko, te waea rānei hei tākaro mā tō tamaiti.




## Pāngarau

I te tau tuaono i te kura, ko te mahi pāngarau a tō tamaiti kei te taumata 3 o te marautanga. He 50-70 ōrau o ngā mahi pāngarau he aro ki te whāwhā i ngā tau.

Ka whakaoti rapanga tūturu ia me te whakamahi i ōna māramatanga ki te tau, te taurangi, te āhuahanga, te ine me te tauanga. E ako ana ia ki te whai i ngā huarahi maha ki te whakaoti rapanga. He maha hoki ngā hikoinga o ēnei momo rapanga, nō reira, me mātau ia ki te kōwhiri i te huarahi e tika ana ki te whakaoti mai.

E ako ana tō tamaiti ki te:

- kōwhiri i te tikanga pai rawa ake ki te whakaoti rapanga (me te whakamahi i te +, -, ×, ÷)
- whakamahi i te whakahaurua tāruarua, ki ngā meka whakareatanga rānei e mōhio ana ia ki te whakaoti rapanga hautau
- rapu i te uara o tētahi tau i roto i tētahi taurira
- whakawehewehe, ki te hanga, ki te tautohu hoki i ngā āhua ahu-2 me ngā āhua ahu-3
- ine i te wā, ki te rapu hoki i te horahanga, i te rōrahi rānei o tētahi taonga
- whakamahi i ngā taunga mahere me ngā ahunga kāpehu ki te tohutohu me ahu pēhea e tae atu ai ki tētahi wāhi.



## He tauira rapanga pāngarau

Mā te titiro anake, matapaetia e hia o ēnei raumata, ina pōkaihia, ka rite te āhua ki te pouaka e whakaahuatia mai ana.

## I te kāinga



Kua rerekē pea te whakaoti rapanga mai i te wā i a koe i te kura. Mā tō tamaiti koe e ako ki ngā huarahi o nāiane.

## Ngā tau me ngā tauira

- Tatauria ngā hautau, whakamua, whakamuri hoki –  $\frac{1}{4}$ ,  $\frac{1}{2}$ ,  $\frac{3}{4}$ , 1,  $\frac{3}{4}$ ,  $\frac{1}{2}$ ,  $\frac{1}{4}$ .
- Kōrerohia ngā wāhanga o te marama, me ngā wā e tika ana mō te hi ika me te whakatō i te kai.
- Kōrerohia ngā taurira e kitea ana i te rangi i waenganui pō – i te raumati, i te takurua – “He aha ngā rerekētanga?”, “He aha pea te take i rerekē ai?”.

## Ngā mahi o ia rā

- Māna koe e āwhina i te hokomaha – rapua ngā kai he māmā rawa te utu, tirohia ngā rahinga me ngā taumahatanga.
- Me tunu kai – tunua tētahi parehe, whiriwhiria ngā kīnaki mō runga, tohaina atu, hoahoainga tētahi pouaka kai ki ō ai te tapahinga parehe.
- Tākarohia ngā kēmu o waho – te whiu ripi, te pā whutupaoro, te kirikiti, te poiwhana, te pīrori rānei.



Ngā mihi ki a rātou mā kua tautoko i te kaupapa nei. Ngā mihi hoki ki te ākongā, nāna te tuhinga i te wāhanga Tuhituhi o tēnei pukaiti.

He kōrero anō mō Ngā Whanaketanga Rumaki Māori he Te Marautanga o Aotearoa kei te pae tukutuku o Te Tāhuhu o te Mātauranga, [www.minedu.govt.nz](http://www.minedu.govt.nz).

Kaitā pikitia: Ellie May Logan.

Kaihoahoa: Spencer Levine.

Ko te pukapuka i te wāhanga Pānui, ko *Piki Whara* nā Kiwa Hammond i tuhi.

I whakaputaina tēnei pukaiti i te tau 2014 mō Te Tāhuhu o te Mātauranga e Hana Limited.

Mana pupuri © Te Tāhuhu o te Mātauranga, 2014.

Nama take: 710946

